

**Apeqquteqaat aallaavigalugu siunnersuut, Kalaallit Nunaata  
sakkulorsorfiunngilluinarnissaata suut pitsaaqtigalugillu ajoqtiginerai.**  
(Inatsisartunut ilaasortaq Anna Wangenheim, Demokraatit).

### **Akissuteqaat**

(Nunanut Allanut, Inuussutissarsiornermut Niuernermullu Naalakkersuisoq)

### **Siullermeerneqarnera**

Naalakkersuisut Inatsisartuni ilaasortaq, Anna Wangenheim, Demokraatit, Kalaallit Nunaata sakkulorsorfiunngilluinarneratigut suut pitsaaqtaanersut ajoqtaanersullu pillugit apeqquut aallaavigalugu oqallisssatut siunnersuutaanut qutsavigaat.

Pissaanilissuit Issittumut tamarmut soqutigisaqarnerat isertugaataanngitsoq ilumoorpoq. Issittup nunattalumi soqutigineqarnerat nutajunngikkaluartoq pissutsit nutaat nunarsuarmi nualluussuup tuniluunneranit, silap pissussaata allanngoriartorneranit Europamilu sorsuttoqarneranit pisut assilissamik nutaaruinnarmik sungiunniagassatsinnik pilersitsiffiupput.

Taamaattumik Issittumi najugaqartuusugut suliassatta suunerannik ilisimaarininnissamik eqqarsaqatigiilluarnissamillu pisariaqartitsiviupput. Pissutsinut nutaanut sungiunniakkatsinnut sunik qanorlu ikiqatigiilluta isumalioqqissaarnissarput pingaaruteqarpoq.

Naalakkersuisut Issittup aarlerinartorsiorfiunnginnissaannik attataqartuarnissarput kissaatigaat. Ullumikkulli Ruslandip nunani tamalaani malittarisassanik taakkulu toqqisisimaffiunerannik unioqqutitsinerat unammilligassarpasuarnik malitseqartitsiviavoq. Nunat allat namminersortuunerannik innarliinermut ataqqinninnginnermullu Nunatta akuersaannginnini naqissuserlugu nunat iligisagut assigalugit Ruslandimut killilersuutinik peqataassalluta upernaaq manna ataatsimiinnitsinni iliuuseqarluta Inatsit tamatuminnga periarfissiisoq taasissutigaarput. Ukiorplassuanngortuni Amerikamiut sakkutuui nunatsinniittut ilisimavarput. Illersornissamut isumaqatigiissut 1951-meersoq tunngavigalugu Kalaallit Nunaata USA-mit illersorneqarnissaaq qulakkeerneqarpoq. Naalakkersiusut taamak qulakkeerinissimaneq allanngortissallugu pilersaaruteqarfiginngilaat. Matumanilu naqissuserlarput Naalakkersuisut nunatta inui isiginnaartuinnartut inissinneqaqqinqisaannarnissaat qularnaarniarlugu sulinertik ingerlammassuk.

Tamannali ima paasineqassanngilaq Issittoq sakkulorsorfiussasoq. Issittumi sakkulorsorluni akerleriittoqassanngilaq. Issittup sakkulersuuffiunnginnera, sakkulersuuffiunngisaannarnissaalu qularnaarumallugu nunarsuup sinneranut eqqaasitsiuarnissaq pingaaruteqarluinnarpoq. 2008-mi Ilulissani atsioqatigiinneq nunat issittumik sineriallit issittumiittortallillu atsiugaat, 2018-imi naqissuserneqaqqittooq, aatsaat taamak pingartigilerpoq nunarsuarmioqatigiinnut eqqaasitsissutiguassallugu. Issittumi inuvugut kinguaassiorluta – Issittoq tassaajuassaaq nunarsuarmi nunat akerleriissutaasinnaasut pillugit oqaloqatigiinnikkut saammaassifik.

Sakkulinnik sakkutooqaraangat sakkulorsorluni akerleriinnissaq aarlerinarnerulersarpoq. Illersornissaq illersornissallu ineriartortinnissaq eqqartoraangatsigu nunatsinnut nunatsinnilu inuiannut suut piviusumik aarlerinartuunersut ukkatarinerunerisigut aarlerinartunik Kalaallit Nunaanniit annikillisaqataarusuppgut.

Nunatsinni inuiannut suut navianaateqartut ukiuni kingullerni sisamani erseqqissiartorsimapput: silap pissusaata allanngoriartornera kiisalu nualluussuup tuniluunnera. Ukiut tamaasa Kalaallit Nunaanniit pinngortitami arlaleriarluni ikuallattoqartarpoq, ilisimatuullu nalunaarlutik silarluttarnerujussuit

akulikilliartuinnassasut. Decemberimi anorersuarnerani innaallagissatigut nalunaarasuartaateqarnikkullu attaveqaativut qanoq aserujatiginersut paasivagut. Silap pissusaata allanngoriartornera pissutigalugu qeriuannartup allanngorneratigut Karrat Kangerluanni qaqqat sisoornissaat ilimanarnerulissanersoq suli ilisimaneqanngilaq, silalli pissusaata allanngoriartornera pissutigalugu qaqqanik sisoortoqaqqinnissaa mattunneqarsinnaanngilaq. Nunarput nunatsinnilu inuiaat illersornissaannut tunngatillugu piviusorsiusagaanni aamma Kalaallit Nunaanni "eqqissinermut" innarliissutaasinnaasut suunerinik ukkataqartuarnissaq pingaaruteqarpoq, tassanilu puiornagu aamma piviusorsiortumik nalilersuisarnissaq pisariaqarmat.

Sinerissami nakkutilliisut pisariaqartinneqarput, ikuallattoornissamut upalungaarsimanerunissaq kiisalu sumiiffimmi tamakkiisumik upalungaarsimanissaq pisariaqartinneqarpoq, attaveqaasersuutit pitsaunerunissaat pisariaqartinneqarput nakkutilliinerlu pitsaanerusoq pisariaqartinneqarluni. Tamanna Issittumi piginnaasanik annertusaaneq pillugu isumaqatigiissummi isumaqatigiissutigineqaqqammersumi aamma erseqqissarneqarpoq.

Taamatut oqaaseqarlunga sammisaq tamanna pingaarutilipilussuaq pillugu oqallilluarnissassinnik kissaappassi.